

摘藻堂四庫全書薈要

集部

欽定四庫全書薈要卷一萬九千八百二十三

集部

唐文粹卷十

宋 姚鉉 編

古調甲

摠一百四十六首

古今樂章

一百三十六首

古樂章

補樂歌十篇

元結

補九夏歌系文九篇

皮日休

今樂章

冬至日祀昊天圓丘樂章八首

魏徵等作

開元樂章十九首

張說

玄宗開元十三年封泰山祀天樂章十三首

正月上辛祈穀於南郊樂章三首

褚亮

季秋享上帝於明堂樂章一首

祀五方上帝於五郊樂章二十首

魏徵等作

祀朝日樂章三首

貞觀中

祀夕月樂章三首

貞觀中

睿宗太極元年祭皇地祇於方丘樂章十一

首

盧從愿
等作

玄宗開元十三年禪社首山祭地祇樂章八

首

賀知章
等作

登太社樂章三首

魏徵等
作

享龍池樂章十首

姚崇等
作

享太廟樂章五首

郭子儀等
作

儀坤廟樂章九首

徐彥伯等
作

琴操一十首

琴操十首 韓愈

補樂歌十篇 并序

元結

自伏羲氏至於殷室凡十代樂歌有其名亡其辭考之
傳記其義或存焉嗚呼樂聲自太古始百世之後盡亡
古音嗚呼樂歌自太古始百世之後遂亡古辭今國家
追復純古列祀往帝歲時薦享則必作樂而無雲門咸
池韶夏之聲故探其名義以補之誠不足全化金石反

正宮羽而或存之猶兀兀冥冥有純古之聲豈幾乎司
樂君子導和焉爾凡十篇二十章各引其義以序之命
曰補樂歌

網罟伏羲氏之樂歌也其義蓋稱伏羲能易人取禽獸
之勞

吾人苦兮水深深網罟設兮水不深吾人苦兮山幽幽
網罟設兮山不幽

右網罟二章章四句

豐年神農之樂歌也其義蓋稱神農教人種植之功
猗太帝兮其智如神兮草實兮濟我生人猗太帝兮其
功如天均四時兮成我豐年

右豐年二章章四句

雲門軒轅氏之樂歌也其義蓋言雲之出潤益萬物如
帝之德無所不施

玄雲溶溶兮垂雨濛濛類我聖澤兮涵濡不窮黃雲漠
漠兮含暎逾光邈我聖德兮溥被無方

右雲門二章章四句

九淵少昊氏之樂歌也其義蓋稱少昊之德淵然深遠
聖德至深兮齋齋如淵生類娛娛兮孰知其然
娛許其反

右九淵一章章四句

五莖顓頊氏之樂歌也其義蓋稱顓頊得五德之根莖
植植萬物兮修修根莖五德涵柔兮淪淪
房戎反而生其

如何兮袖袖
似周反天下皆自我君兮化成

右五莖一章章七句

六英高辛氏之樂歌也其義蓋稱帝嚳能摠六合之英華

我有金石兮擊拊淙淙與汝歌舞兮上帝之風由六合兮英華颯颯我有絲竹兮韻和泠泠與汝歌舞兮上帝之聲由六合兮根柢羸羸

右六英二章章六句

咸池陶唐氏之樂歌也其義蓋稱堯德至大無不備全元化油油兮孰知其然至德汨汨姑沒反兮順之以先元

化泥泥尾音兮孰知其然至道泱泱兮由之以全

右咸池二章章四句

大韶有虞氏之樂歌也其義蓋稱帝舜能紹先聖之德
森森羣象兮日見生成欲聞朕初兮玄封冥冥洋洋至
化兮日見深柔欲聞涵濩兮大淵油油

右大韶二章章四句

大夏有夏氏之樂歌也其義蓋稱禹治水其功能大中

國

茫茫下土兮乃生九州山有長岑兮川有深流茫茫下
土兮乃均四方國有民人兮野有封疆茫茫下土兮乃
歌萬年上有茂功兮下戴仁天

右大夏三章章四句

大濩有殷氏之樂歌也其義蓋稱湯救天下濩然得所
萬姓苦兮怨且哭不有聖人兮誰濩育聖人生兮天下
和萬物熙熙兮舞且歌

右大濩二章章四句

補九夏歌系文九篇

并序

皮日休

周禮鍾師掌金奏九樂事以鍾鼓奏九夏按鄭康成注云夏者大也樂之大者歌有九也九夏者皆詩篇名頌之類也此歌之大者載在乎樂章樂崩亦從而亡是以頌不能具也嗚呼吾觀之魯頌其古也亦已久矣九夏亡者吾能頌乎夫大樂既去至音不嗣頌於古不足以補亡頌於今不足以入用庸何頌乎頌之亡者俾千古之下鄭衛之內窈窕冥冥不獨有大卷

音拳黃
帝樂名

之音者

乎

王夏之歌者王出入之所奏也

燿燿皎日欵麗於天厥明御舒如王出焉燿燿皎日欵
入於地厥晦厥貞如王入焉出有龍旂入有珩珮勿驅
勿馳惟慎惟戒出有嘉謀入有內則繫彼臣庶欽王之
式

王夏四章章四句

肆夏之歌者尸出入之所奏也

愔愔清廟儀儀衮服我尸出矣迎神之穀杳杳陰竹坎
坎路鼓我尸入矣得神之祐

肆夏二章章四句

昭夏之歌者牲出入之所奏也

有鬱其鬯有儼其彝九變未作全乘來之既醑既酢爰
棟音肩爰舞象物既降全乘之去

昭夏二章章四句

納夏之歌者四方賓客來之所奏也

麟之儀儀不繫不維樂德而至如賓之娛鳳之愉愉不
箒不斂樂德而至如賓之娛自筐及管我有牢醑自筐
及篚我有貨幣我牢不愆我貨不匱碩碩其才有樂而
止

納夏四章章四句

章夏之歌者臣有功之所奏也

王有虎臣錫之鈇鉞征彼不悞一撲而滅王有虎臣錫
之圭瓚征彼不享一烘而泮王有掌訝道音爾疆理王

有掌客饋爾饗餼何以樂之金石九奏何以賜之龍旂

九旒

去聲

章夏四章章四句

齊夏之歌者夫人祭之所奏也

璽璽衡筭翬翬禴翟自內而祭為君之則

齊夏一章章四句

族夏之歌者族人酌之所奏也

洪源誰孕疏為江河大塊孰埏播為山阿厥流浩漾厥

勢嵯峨今君之酌慰我實多

族夏二章章四句

祓夏之歌者賓出之所奏也

禮酒既酌嘉賓既厚饋為之奏禮酒既竭嘉賓既悅應
為之節禮酒既罄嘉賓既醒雅為之行

饋應雅三樂器也賓醉而出奏

祓夏以此三器築地為之行事也

祓夏三章章三句

鷺夏之歌者公出入所奏也

桓桓其珪衮衮其衣出作二伯天子是毗桓桓其珪衮衮其服入作三孤國人是福

鷲夏二章章四句

冬至日祀昊天圓丘樂章八首

魏徵等作

降神用豫和

上靈睠命膺會昌盛德殷薦叶辰良景福降兮聖德遠
玄化穆兮天歷長

皇帝行用太和

穆穆我后道應千齡登三處大得一居貞禮惟崇德樂
以和聲百神仰止天下文明

登歌奠玉帛用肅和

閭陽播氣甄曜垂明有赫圓宰深仁曲成日麗蒼壁烟
開紫營聿遵虔享式降鴻禎

迎俎用雍和

欽惟大帝載仰皇穹始命田燭爰啟郊宮雲門駭聽雷
鼓鳴空神其介祀景祚斯融

酌獻飲福用壽和

八音斯奏三獻畢陳寶祚惟永光輝日新

送文舞出迎武舞入用舒和

壘壁凝影皇壇路編珠流彩帝郊前已奏黃鐘歌大呂
還符寶歷祚昌年

武舞作用凱安

昔在炎運終中華亂無象鄴郊赤烏見邙山黑雲上大
賚下周車禁暴開殷網幽明同叶贊鼎祚齊天壤

送神用豫和

歌奏畢兮禮獻終六龍馭兮神將昇明德感兮非黍稷
降福簡兮祚休徵

開元樂章十九首

張說

迎神永和之樂三章

肅九室諧八音歌皇慕動神心禮宿設樂妙尋聲明格
裸奠臨律迓氣音入玄依玉几御黼筵聆愾息僾周旋
九韶遍百福傳信工祝永頌聲來祖考聽和平相百辟

貢九瀛神休委帝孝成

皇帝行太和之樂一章

時文聖后清廟肅雍致誠勤孝在貌思恭玉節四夏金
鏘五鍾繩繩雲步穆穆天容

酌瓚登歌肅和之樂一章

天子孝享工歌溥將躬裸鬱鬯乃蕪管籥臭以達陰聲
以求陽奉時蒸嘗永代不忘

迎俎雍和之樂二章

在滌嘉泰麗碑敬牲角握之壯色純之駢火傳陽燧水
溉陰精太公胖俎傳說和羹齋戒豐潔俎豆有馨亦有
和羹既戒既平鼓鍾管磬肅唱和鳴皇皇后祖來我思
成

酌獻用文舞一章

聖謨九德真言五千慶集昌胤符開帝先高文仗鉞克
配彼天三宗握鏡六合煥然帝其承祀率禮罔愆圖書
霧出日月清懸舞形德類詠論功傳黃龍蜿蜒綵雲蹠

躔五行氣順八佾風宣介此百福於皇萬年

宣皇帝室光大之舞一章

肅肅藝祖滔滔濬源有雄玉劔作鎮金門文王餘緒后稷謀孫肇禋九廟四海來尊

光皇帝室長發之舞一章

具禮崇德備樂承風魏推幢主周贈司空不行而至無成有終神與王業天歸帝功

景皇帝室大政之舞一章

於赫元命權輿帝文天齊八柱地半三分宗廟觀德笙
鏞樂勲封唐之兆成天下君

元皇帝室大成之舞一章

帝舞季歷襲聖生昌后歌有媧胎炎孕皇天地合德日
月齊光肅雍孝享祚我萬方

高祖神堯皇帝室大明之舞一章

赤精亂德四海困窮黃旗舉義三靈會同旱望春雨雲
披大風溥天來祭高祖之功

太宗文武聖皇帝室崇德之舞一章

皇合一德廟宗百神削平天下大拯生民上帝配食單
于入臣戎歌陣舞曄曄蒸蒸

高宗天皇大帝室鈞天之舞一章

高皇邁道端拱無為化懷獯鬻兵戢句驪禮尊封禪樂
盛來儀合位媧后同稱伏羲

中宗孝和皇帝室文和之舞一章

退居江水鬱起丹陵禮物還舊朝典中興龍圖反及駿

命恭膺鳴球香瓊大禧是承

睿宗大聖真皇帝室景雲之舞一章

景雲霏爛告我帝符噫帝沖德與天為徒笙鏞遙遠俎
豆虛無春秋孝獻因復此都

皇帝受福酒胙福和之樂一章

備禮用樂崇親致尊誠通慈降敬徹愛存獻懷稱壽啐
感承恩皇帝孝德子孫千億大包天域長亘不極

送文舞迎武舞一章

六鍾翕協六變成八佾倘佯八風生樂九韶兮人神感
美七德兮天地清

亞終獻武舞凱安之樂四章

瑟彼瑤爵亞維上公室如屏氣門不容躬禮殷其本樂
執其中聖皇所慕天地幽通禮币三獻樂變九成降循
軒陞仰欵皇情福與仁合德因孝明百年神畏四海風
行總總干戚填填鼓鐘奮揚增氣坐作為容離若鷲鳥
合如戰龍萬方觀德肅肅雍雍烈祖順三靈文宗威四

海黃鉞誅羣盜朱旗掃多罪戢兵天下安約法人心改
大哉干羽意長見風雲在

撤豆登歌一章

止笙磬撤豆籩廓無響宵又玄主在室神在天情餘慕
禮罔愆嘉黍稷屢豐年

送神一章

眇嘉樂援靈爽感若來思如往休氣息迴風上返寂寞
還惚恍懷虛駕結空想

玄宗開元十三年封泰山祀天樂章一十三首

降神用豫和六變

夾鍾宮之一

款泰壇柴泰清受天命報天成竦皇心薦樂聲志上達
歌下迎

夾鍾宮之二

億上帝臨下庭騎日月陪列星嘉視信大禧馨澹神心
醉皇靈

夾鍾宮之三

相百辟貢八荒九歌敘萬舞翔肅振振鏘皇皇帝欣欣
福穰穰

黃鍾宮之四

高在上道光明物資始德難名承眷命牧蒼生寰宇謐
太階平

太簇徵之五

天道無親至誠與鄰山川遍禮宮徵惟新玉帛非盛聰

明會真正斯一德通乎百神

姑洗羽之六

饗帝饗親維孝維聖緝熙懿德敷揚成命華夷志同笙
鏞禮盛明靈降止感此誠敬

迎送皇帝用太和

孝敬中發和容外彰騰華照寓如昇太陽真璧就奠玄
靈垂光禮樂具舉濟濟洋洋

登歌奠玉帛用肅和

羽調

奠祖配天承天享帝百靈咸秩四海來祭植我蒼壁布
我玄製華日徘徊神烟容稟

迎俎入用雍和

俎豆有飶絜粢豐盛亦有和羹既戒既平鼓鍾管磬肅
唱和明皇皇后祖來我思成

酌獻用壽和

蒸蒸我后享獻惟寅躬酌鬱鬯跪奠明神孝莫孝乎配
上帝於親敬莫敬乎教天下為臣

皇帝飲福酒用壽和

皇祖嚴配享皇天
皇降嘏天子萬年

送文舞出迎武舞入用舒和

商調

六鍾翕協六變成八佾
倘佯八風生樂九韶兮
人神感美七德兮天地清

送神用豫和

夾鍾宮調

禮樂終禋燎上懷靈惠
結皇想歸風莊迴天爽
百福來衆神往

正月上辛祈穀於南郊樂章三首 褚亮

登歌奠玉帛用肅和

履艮斯繩居中體正龍運垂祉昭符啟聖式事嚴禋聿
懷嘉慶惟帝永錫時皇休命

迎俎用雍和

殷薦乘春太壇臨曙八簋盈和六瑚登御嘉稷匪歆德
馨斯飫祝嘏無易靈心有豫

送文舞出迎武舞入用舒和

玉帛犧牲申敬享
金絲戚羽盛音容
庶俾億齡禔景福
長欣萬寓洽時邕

季秋享上帝於明堂樂章一首

送文舞出迎武舞入用舒和

御宸合宮承寶歷
席圓重館奉明靈
偃武修文九圍泰
沈烽靜柝八荒寧

祀五方上帝於五郊樂章二十首

魏徵等作

祀黃帝降神

宮音

黃中正位含章居貞既長六律兼和五聲畢陳萬舞乃
薦斯牲神其下降永祚休平

登歌奠玉帛用肅和

眇眇方輿蒼蒼圓蓋至哉樞紐宅中圖大氣調四序風
和萬籟祚我明德時雍道泰

迎俎用雍和

金縣夕肆玉俎朝陳饗薦黃道芬流紫辰迺誠迺敬載
享載禋崇祀斯在惟皇是賓

送文舞出迎武舞入用舒和

御徵乘宮出郊甸安歌率舞遞將迎自有雲門符帝賞
猶持雷鼓荅天成

祀青帝降神用角音

鶴雲旦起鳥星昏集候啟新風陽開初蟄至德可饗行
潦斯挹錫以無疆蒸人乃粒

登歌奠玉帛用肅和

元鳥司春蒼龍登歲節物變柳光風轉蕙瑤席降神朱

絃享帝誠備祝嘏禮殫珪幣

迎俎用雍和

大樂希音至誠簡禮文物斯建聲名濟濟六變有成三
登無體迺眷豐絜恩覃愷悌

送文舞出迎武舞入用舒和

笙歌籥舞屬年韶鷺鼓鳧鍾辰時豫調露初迎綺春節
承雲遽踐蒼霄馭

祀赤帝降神用徵音

青陽告謝朱明戒序咸長是祈敬陳椒醑博碩斯薦笙
鏞備舉庶盡肅恭非馨稷黍

登歌奠玉帛用肅和

離位克明火中宵見峯雲暮起景風晨扇木槿初榮含
桃可薦芬馥百品鏘洋三變

迎俎用雍和

昭昭丹陸奕奕炎方禮陳牲幣樂備篪簧瓊羞溢俎玉
齊浮觴恭惟正直歆此馨香

送文舞出迎武舞入用舒和

千里溫風飄絳羽十枝炎景騰朱干陳觴薦俎歌三獻
拊石撝金會七盤

祀白帝降神用商音

白藏應節天高氣清歲功既阜庶類收成萬方靜謐九
土和平馨香是薦受胙聰明

登歌奠玉帛用肅和

金行在節素靈居正氣肅霜嚴林凋草勁豺祭隼擊潦

收川鏡九穀已登千箱流詠

迎俎用雍和

律應西成氣躔南呂珪幣咸列笙竽備舉苾苾蘭羞芬
芬桂醑式資宴貺用調霜序

送文舞出迎武舞入用舒和

璿儀氣爽驚緹籥玉呂灰飛含素商鳴鞀奏管芳羞薦
會舞安歌葆眊揚

祀黑帝降神用羽音

嚴冬季月星迴風厲享祀報功方祈來歲

登歌奠玉帛用舒和

律周玉琯星回金度次極陽烏紀窮陰兔火林霰雪湯
泉凝洹八蜡已登三農息務

迎俎用雍和

陽月斯紀應鍾在候載潔牲牲爰登俎豆既高既遠無
聲無臭靜言格思惟神保祐

送文舞出迎武舞入用舒和

執籥持羽初終曲朱干玉戚始分行七德九功咸已暢
明靈降福具穰穰

祀朝日樂章三首

貞觀中作

登歌奠玉帛用肅和

惟聖格天惟明饗日帝郊肆類王宮戒吉珪奠春舒鍾
歌曉溢禮云克備斯文有秩

迎神用雍和

晨儀式薦明祀惟光神物爰止靈暉載陽玄端肅事紫

幄興祥福履攸假於昭令王

送文舞出迎武舞入用舒和

崇牙樹羽延調露旋宮扣律掩烝雲誕敷懿德昭神武
載集豐功表睿文

祀夕月樂章三首

貞觀中作

登歌奠玉帛用舒和

測妙為神通微曰聖坎祀貽則郊禋展敬璧薦登光金
歌動映以載嘉德以流曾慶

迎俎用雍和

肫晨爭舉天宗禮闕夜典涼秋陰明湛夕有齊斯旨有
牲斯碩穆穆其暉穰穰是積

送文舞出迎武舞入用豫和

合吹八風金奏動分容萬舞玉鞘驚辭昭茂典光前列
夕曜成功表舊明

睿宗太極元年祭皇地祇於方丘樂章十一首

林鍾商

盧從愿

大樂和暢殷薦明神一降通感八變必臻有求斯應無
德不親降靈醉止休徵萬人

太蔟角

坤元載物陽樂發生播殖資始品彙咸亨列俎綦布方
壇砥平神歆禋祀后德惟明

姑洗徵

劉冕

大君出震有事郊禋齋戒既肅馨香畢陳樂和禮備候
暖風春恭惟降福實賴明神

南呂羽

韓休

於穆濬哲維清緝熙肅事昭配永言孝思滌濯靜嘉馨
香在茲神之聽之用受福釐

皇帝行用太和

黃鍾宮

王暎

於穆聖皇六葉重光太原刻頌后土疏場寶鼎呈符敲
雲孕祥禮樂備矣降福穰穰

登歌奠玉帛用肅和

蕤賓均之
夾鍾羽

崔玄同

聿脩嚴配展事禋宗祥符寶鼎禮備黃琮祝辭以信明
德惟聰介茲景福永永無窮

登俎用雍和

黃鍾均之
南宮羽

賈曾

蠲我浙糝潔我膋薌有豆孔碩為羞既臧至誠無昧精
意惟芳神其醉止欣欣樂康

酌獻飲福用壽和

禮物斯具樂章乃陳誰其作主皇考聖真對越在天聖
明佐神宵然汾汾厚澤如春

送文舞出迎武舞入用舒和

太簇宮

何鸞

樂奏云闋禮章載虔禋宗于地昭嘏于天惟馨薦矣既
醉歆焉神之降福永永萬年

武舞用凱安

黃鍾均之
林鍾徵

蔣挺

維歲之吉維辰之良聖君紱冕肅事壇場大禮已備大
樂斯張神其醉止降福無疆

送神用順和

源光裕

方丘既膳嘉饗載謚齋敬畢誠陶匏貴質秀簋豐薦芳
俎盈實永永福流其昇如日

玄宗開元十三年禪社首山祭地祇樂章八首

迎神用順和

賀知章

至哉合柔德萬物資以生恒順稱厚載流謙通變盈聖
心事能察增廣陳厥誠黃祇儉如在泰折俟咸亨

皇帝行用太和

肅我成命於昭黃祇裘冕而祀陟降在斯五音克備八

變聿施緝熙肆靖厥心匪離

登歌奠玉帛用肅和

黃祇是祇我其夙夜寅畏誠潔匪遑寧舍禮以琮玉薦
厥茅藉念茲降康胡寧克暇

迎俎用雍和

夙夜宥密不敢寧宴五齊既陳八音在縣梁盛以絜房
俎斯薦明德惟馨尚茲克徧

皇帝初獻用壽和

惟以明發有懷載殷樂盈而返禮順其裡立清以獻薦
欲是親於穆不已哀對斯臻

皇帝飲福用福和

穆穆天子告成岱宗大裘如濡執珽有顒樂以平志禮
以和容上帝臨我云胡肅邕

皇帝還宮用太和

昭昭有唐天卑萬國列祖應命四宗順則申錫無疆宗
我同德曾孫繼緒享神配極

送神用靈具醉

代順和

源乾曜

靈具醉杳熙熙靈將往眇惺惺顧明德吐正辭爛遺光
流禎祺

登太社樂章三首

魏徵等作

登歌奠玉帛用肅和

后土凝德神功叶契九域底平兩儀交際戊期應序陰
墉展幣靈車少留俯歆樽桂

迎俎用雍和

美報崇本嚴恭展事受露流壇承風啟地絜粢登俎醇
犧入饋介福遠流羣生畢遂

送文舞出迎武舞入用舒和

神道發生敷九稼陰陽乘仁暢八埏緯武經文陶景化
登祥薦祉啟豐年

享龍池樂章十首

第一章

姚崇

恭聞帝里生靈祉應報明君鼎業新既叶翠泉光寶命

還符白水出真人當時舜海潛龍躍此日堯池帶馬巡
獨有前河一小鴈叨承舊惠入天津

第二章

帝宅王家大道邊神馬潛龍涌聖泉昔日昔時經此地
看來看去漸成川歌臺舞榭宜正月柳岸梅洲勝往年
莫疑波上春雲少祇為龍飛直上天

第三章

沈佺期

龍池躍龍龍已飛龍德先天天不違池開天漢分黃道

龍向天門入紫微
邸第樓臺多氣色
君王鳧鴈有光輝
為報寰中百川水
來朝此地莫東歸

第四章

代邸東南龍或躍
泉清碧浪遠浮天
樓臺影就波中出
日月光疑鏡裏懸
鴈沼迴流成舜海
龜書薦祉應堯年
大川既濟慚為楫
報德空思奉細涓

第五章

姜皎

龍池初此出龍山
常經此地謁龍顏
日日芙蓉生夏水

年年楊柳變春灣
堯壇寶匣餘烟霧
舜海漁舟尚往還
願以飄飄五色影
從來從去九天間

第六章

龍興白水漢興符
聖主時乘運斗樞
岸上芊茸五花樹
波中的鑠千金珠
操環昔聞迎夏啟
發匣先來瑞有虞
風色雲光隨隱見
赤雲神化象江湖

第七章

蘇頲

西京鳳郎躍龍泉
佳氣休光鍾在天
軒后霧圖今已得

秦王水劍昔常傳
恩魚不似昆明釣
瑞鶴長如太液仙
願侍巡遊同舊里
更聞簫鼓濟樓船

第八章

李 乂

星分邑里四人居
水滂源流萬頃餘
魏國君王秤象處
晉家藩邸化龍初
青蒲似騁遊梁馬
綠藻疑游宴鎬魚
自有神靈滋液地
年年雲物史官書

第九章

姜 晞

靈沼縈迴邸第前
浴日涵春寫曙天
始見龍臺昇鳳闕

應如霄漢起神泉石匱渚傍還啟聖桃李初生更有仙
欲化帝圖從此受正同河變一千年

第十章

乾坤啟聖吐龍泉泉水年年勝一年始看魚躍方成海
即覩龍飛利在天洲渚遙將銀漢接樓臺直與紫微連
休氣榮光恒不散懸知此地是神仙

享太廟樂章五首

玄宗至道大聖大明孝皇帝室奠獻用廣運之

舞一章

郭子儀

於赫皇祖昭明有融惟文之德惟武之功河海靜謐車
書混同虔恭孝饗穆穆玄風

肅宗文明武德大聖大宣孝皇帝室奠獻用惟

新之舞一章

劉晏

漢運惟永神功中興風驅氛祲天覆黎蒸三光再朗庶
績其凝重熙累葉景命是膺

代宗睿文孝武皇帝室奠獻用保大之舞一章

郭子儀

於穆文考聖神昭彰蕭勺羣慝含光遠方萬物茂遂九
夷賓王悃悃雲韶德音不忘

德宗神武孝文皇帝室奠獻用文明之舞一章

鄭 綱

於穆時文受天明命允恭玄默化成理定出震嗣德應
乾傳聖猗歟緝熙千億流慶

憲宗聖神章武孝皇帝室奠獻用象之舞一章

段文昌

肅肅清廟登顯至德澤周八荒兵定四極生物咸遂羣盜滅息明聖繼承子孫千億

儀坤廟樂章九首

迎神用永和

林鍾宮

徐彥伯

猗若清廟肅肅熒熒國薦嚴祀坤興淑靈有几在室有樂在庭臨茲孝享百祿惟寧

皇帝行用太和

黃鍾宮

丘悅

孝哉我后冲乎迺聖道映重華德輝文命慕深視篋情
殷撫鏡萬國移風兆人承慶

酌獻登歌用肅和

中呂均
之太簇

張齊賢

標圭既濯鬱鬯既陳畫幕雲舉黃流土醇儀充獻酌禮
盛衆裡地察惟孝愉焉饗親

迎俎用雍和

林鍾
宮

薛稷

陽靈配德陰魄昭升堯壇鳳下漢室龍興覩天作對前
旒是凝化行南國道盛西陵造舟集灌無德而稱我粢

既潔我醴既澄陰陽靈廟光靈若憑德馨惟饗孝思蒸
蒸

昭成皇后室酌用坤貞

乾道既亨坤元以貞肅雍攸在輔佐斯成外睦九族內
光一庭克生睿哲祈我休明欽若徽範悠哉淑靈建茲
清宮于彼上京縮茅以獻潔秬惟馨實受其福期乎億
齡

飲福酒用壽和

宮黃鍾

徐堅

於穆清廟肅雍嚴祀合福受釐介以繁祉

送文舞出迎武舞入用舒和 胡 雄

送文迎武遞參差一始一終光聖儀四海生人歌有慶
千齡孝享肅無虧

撤俎用雍和

蕤賓均
之夾鍾

員半千

孝享云畢維撤有章雲感玄羽風悽素商瞻望神座祇
戀匪遑禮終樂闋肅雍鏘鏘

送神

商 林鍾

祝欽明

閔宮實實清廟微微降格無象馨香有依式昭纂慶方
融嗣徽明裡是享神保聿歸

琴操十首

韓愈

將歸操

秋之水分其色幽幽我將濟兮不得其由涉其淺兮石
齧我足乘其深兮龍入我舟我濟而悔兮將安歸尤歸
乎歸乎無與石鬪兮無應龍求

猗蘭操

蘭之猗猗揚揚其香不採而佩於蘭何傷今天之旋其
曷為然我行四方以日以年雪霜賀賀薺麥之茂子如
不傷我不爾覲薺麥之茂薺麥之有君子之傷君子之
守

龜山操

龜之氣兮不能為雨龜之楨兮不中梁柱龜之大兮祇
以奄魯知將隳兮哀莫予伍周公有鬼兮嗟予歸輔

越裳操

雨之施物以孳我何意於彼為自周之先其艱其勤以
有疆宇私我後人我祖在上四方在下厥臨孔威敢戲
以侮孰荒于門孰治于田四海既均越裳是臣

拘幽操

目窈窈兮其凝其盲耳肅肅兮聽不聞聲朝不日出兮
夜不見月與星有知無知兮為死為生嗚呼臣罪當誅
兮天王聖明

岐山操

我家於幽自我先公伊我承序敢有不同今狄之人將
土我疆民為我戰誰使死傷彼岐有岨我往獨處爾莫
余追無思我悲

履霜操

父兮兒寒母兮兒饑兒罪當答逐兒何為兒在中野以
宿以處四無人聲誰與兒語兒寒何衣兒饑何食兒行
于野履霜以足母生衆兒有母憐之獨無母憐兒寧不
悲

金
卷十
雉朝飛操

雉之飛于朝日羣雌孤雄意氣橫出當東而西當啄而
飛隨飛隨啄羣雌粥粥嗟我雖人曾不如彼雉雞生身
七十年無一妾與妃

別鵲操


雄鵲銜枝來雌鵲啄泥歸巢成不生子大義當乖離江
漢水之大鵲身鳥之微更無相逢日且可繞樹相隨飛

殘形操

有獸維狸兮我夢得之其身孔明兮而頭不知吉凶何
為兮覺坐而思巫咸上天兮識者其誰



唐文粹卷十



總校官庶吉士臣張能照

校對官庶吉士臣翟槐

謄錄貢生臣王嘉稷

欽定四庫全書薈要

集部

唐文粹卷十一

二

詳校官候選知縣臣吳甸華



欽定四庫全書薈要卷一萬九千八百二十四

集部

唐文粹卷十一

宋姚鉉編

古調乙

總四十六首

楚騷體十一

九諷系述

皮日休

反招蒐

悼賈

效古詩三十五



江有楓一篇

蕭穎士

菊榮五章

有竹一篇

蟬鳴五章

宋華

涼雨一篇

蕭穎士

虞獲子鹿一篇

韋應物

上古之什補亡訓傳十三章

顧況

倬彼我系一篇

王勃

元和聖德詩一首

韓愈

鄆州溪堂詩一首

漢隄詩一首

盧肇

有所恨二章

歐陽詹

河之水二章

韓愈

九諷系述

并序

皮日休

昔在屈平既放作離騷經正詭俗而為九歌辨窮愁而為九章是後詞人撫而為之皆所以嗜其麗詞擅其逸

藻者也至若宋王之九辨王褒之九懷劉向之九嘆王
逸之九思其為清怨素豔幽快古秀皆得芝蘭之芬芳
鸞鳳之毛羽也然自原已降繼而作者皆相去數百祀
足知其文難述其辭罕繼者矣大凡有文人不擇難易
皆出於毫端者乃大作者也揚雄之文丘軻乎而有廣
騷也梁竦之辭班馬乎而有悼騷也又不知王逸奚罪
其文不以二家之述為離騷之兩派也昔者聖賢不偶
命必著書以見志況斯文之怨抑歟噫吾之道不為不

明吾之命未為不偶而見志斯文者吾懼來世任臣之君因謗而去賢持祿之士以猜而遠德故復嗣數賢之作以九為數命之為九諷焉嗚呼百世之下復有修離騷章句者乎則吾之文未過不為乎廣騷悼騷也

粵勾亶之薄俗兮其風狡而且苦吾欲以直道樞其邪心兮皆騁容而莫顧前誨行兮後止高諭仰兮下俯咸謂吾之儼為愚兮並以吾之糴為傴羌靈脩之乃吾知兮先職我而為輔奈其臣之狺狺兮乃不知吾之所撫

吾欲以明詰之性辨君臣之分兮定文物之數吾欲以
正訐之道兮進忠賢而退奸豎吾欲以醇醲之化兮反
當今而為往古吾欲以忖度之志兮定觚圓而反規矩
念僥覆之在位兮若臬羊之當路內灼怛以為儔兮復
何知其所愬乃指天而鬱悠兮將天奪乎國祐永惄惄
以何言兮將求知于吾祖

正俗

有昉兮點而謂之不絜有泉兮壅而謂之不決有菹兮

輶而謂之不芳有軸兮鑿而謂之不轍聲咷

許遠切

唏以

無音兮氣鬱悒而空咽既怒怒以增懼兮又謾謾

漫而

不訣誣彭祖以為孺兮譎殤子以為耄夥衆人之難信

兮擗夸者之不悅佞為疣兮何去姦為疣兮莫劓

音刮讟

為轡兮莫御謗為玉兮何切彘既臙而必烹兮木方炭

子公切

兮必折心轆轤而似車兮思絲絲而如徒手欲動

兮似拳足將行兮如綫既不辨其顏跖兮遂一貫於堯

桀吾哀生之不逢兮奚至死而愜愜念帝座之不燼

朗他

切兮故交光於卷舌既何路以自辨兮遂沒齒而癆刺

遇謗

靳尚之言兮美如嬪子蘭之氣兮醜于醒既怒睖

音以

相向兮遂裹足而南征面慙慙以奚色兮心慄慄以何
情耳方聰兮忽睽目正視兮忽盲目當午兮便是天方
晝兮不明欲泣兮有血將啼兮失聲望靈脩兮似失出
國門兮若驚軻識怨兮亦緩駟知愁兮復鳴既徜徉兮
夏水復春戀兮南荆嗟余夙秉于大訓兮涵清骨之忠

貞既質質者之莫予容兮向重蒼而自盟既憐

路南切

仁

以憑義兮遂鈇信而規

規誠

將真宰之不仁兮胡為役

余以此生彼鷲斯之蝨賊兮固不能容乎鷓鷯彼茨菘
之叢穢兮固不能讓乎杜蘅已矣乎國無人兮莫我留
將訴帝於玉京

見逐

荷為裊

丁牛切

兮芟為襪

碑切

荃為襪

居勿切

兮薜為禕弭吾

棹兮澧之浦駐吾楫兮湘之湄悲莫悲兮新去國怨莫

怨兮新相思幽篁蕭兮靜晚清漪澹兮去遲湘君欲出

兮風水急帝子不來兮煙雨微芷既老兮白芍於角日切

將暮兮紅萋朝浮乎鶻蹠啼夕叫乎羈雌禮漾漾兮

不止黃悠悠兮何之日出沒兮北渚雲依佈兮九疑

既無人以辯余兮又何心而怨咨退不解其怳上音

音兮進不知其怵怩寒蜩怨而無聲兮古木淒其寡枝下

嗟吾魄之不反兮千秋萬歲湘中馳

悲遊

慨天道之不明兮何獨生此大佞若獘烏八切之能冠

兮當一國而持柄見舌臣之反詐兮信其主以不競轍

已覆而又遵兮佞五迄切將翻而不整不思心腹之疾兮

又玩膏肓之病竟客死於咸陽兮終不作毒王之幸既

養虜火胡切以為患兮遂倒鉞音狂以授柄將諛臣以肆禍

兮豈上天之付命粵吾大以為不可兮彼以災而為慶

儻靈均之魄有知兮刷吾恥於下暝

憫邪

有美一人兮端憂千喑陰萬愁兮曾不得以少休腸結
多以莫迴兮淚啼極而不流王孫何處兮碧草極目公
子不來兮清湘滿樓汀邊月色兮曉將曉浦上蘆花兮
秋復秋天沈寥以似淬兮峰巉崿以如抽篴管颯兮雨
岸杜若死兮霜洲遺余程兮澧之側整余陌兮湘之幽
望女嬃兮秭歸夢懷宋玉兮荆門愁欲向天以號咷兮
寸晷不可以少留又不知吾魄所處兮永冥冥以悠悠

端憂

山之巔兮水之涘桂為祠兮蘭為祀執玉桴兮扣雷鼓
奠金盃兮滴浮蟻薦瓊芳兮望暮雲獻椒醕兮拜寒水
祝肸鬩以怪談兮巫妖冶而魅醉波閃倏兮湘君竹蕭
疎兮帝子日將暮兮河伯秋正深兮山鬼神之化兮何
方人之艱兮至此胡不化其邪而為正兮胡不反其戾
而為義胡不轉其亡而為興兮胡不易其亂而為治但
血食於下國兮曾不少禋於有位吾將乘青螭而駕白
蚪兮謁帝而訴神之累請天弧發鏃兮天棊行筮神速

悔尤兮俾吾靈脩而易志

紀祀

粵吾秉志兮繫於瑾瑜芬其德而芳其道兮榮於薜蘿
將興國以見罪兮擬佐王而蒙辜彼羣小之茸茸兮如
慕臭之鼈蝓以大鵬為爵兮以康瓠為觚以衮衣為襟
兮以藜丘為墟以鄭姬為醜兮以子產為愚以鮑焦為
貪兮以孔聖為巫吾將奮鱗於大空兮奚獨慕此江湖
吾將發榮於蟠桃兮奚獨守此蒿萋吾將蕩其魄兮驂

風軻與軋車謁帝於冥冥之天兮秉其生殺之樞將飄
飄以為逝兮亦何必懷此佞邪之故都

捨慕

堯死兮舜滅禹殄兮湯絕似玉兮將沈如金兮永沒行
以仁兮止以義生以貞兮死以絜念余曾不足以蹈聖
闡兮亦慕茲而自悅湘浦兮煙深沅江兮風切顧影兮
自憐撫躬兮永訣鬼慘兮神悲雨泣兮泉咽竟汨沒以
齏淪兮永幽憂而怫鬱湘之山兮未盡湘之流兮不竭

千秋兮愁雲萬古兮明月靈均之寃兮孰能銷其氣靈
均之愁兮孰能釋其結來者之自鑒兮無致位於牙孽

絜死

反招魂 并序

屈原作大招魂

或曰景差作
疑不能明

宋玉作招魂皮子以為忠

放不如守介而死奚招魂為故作反招魂一篇以辨之

辭曰

承溟滓之命兮付余才而輔君君既不得乎志兮余飄

飄而播遷余蕩大空而就滅兮君又招余俾復身余詣
帝以請訣兮帝俾巫陽以筮云巫陽語余以不可歸兮
故作詞以招君乃下招曰余君兮歸來故都慎不可留
些其君雄虺兮其民封狐些食民之肝鬲以為其肉兮
摘民之髮膚以為其衣些朝刀鋸而暮鼎鑊兮上曖昧
而下墨眉尿癡些君兮歸來故都慎不可留些余昔為
比干之魄兮干僂而余去些未聞于貪生以自招兮余
竟終其所處些君兮歸來故都慎不可留些余昔為伍

胥之魄兮胥僂而余逝些未聞胥貪位以惜生兮執屬
鏤而不滯些君兮歸來故都慎不可留些余昔為弘演
之魂兮演自殘而余行些余未聞演惜余以不死兮俾
其義而益明些君兮歸來故都慎不可留些帝命余以
輔君兮亦以君之忠介些今以忠而見聞兮尚盤桓而
有待些將自富貴而入羈旅兮其志乃悔些將戀骨肉
而惜家族兮何不自裁些梟食母而獍食父兮見禽獸
之為生些苟死殘者眉壽兮實梟獍而同名些君乎慎

勿懷故都之戀歸來乎余為君存千古忠烈之榮枯些

悼賈 并序

余嘗讀賈誼新書見其經濟之道真命世王佐之才也
自漢氏革嬴高祖得於矢石不暇延儒人及為天子制
缺度弛處華而夷是時獨有叔孫生能定朝儀其制未
悉唯生草其書欲以制屈諸侯推定正朔調革輿服通
流貨幣天不祐漢絳灌興謗竟枉其道出傳湘沅生自
以不得志哀屈平之放逐及渡湘沈文以弔之故其辭

曰臆

稿

九州而相君兮何必懷此故都噫余釋生之意

矣當戰國時屈平不用於荆則有齊趙秦魏矣何不捨
荆而相他國乎余謂平雖遭靳尚子蘭之讒不忍捨同
姓之邦為他國之相宜矣然則生之見棄又甚於平當
漢時捨文帝則諸侯矣如適諸侯則新書之文抑諸侯
而尊天子也捨諸侯則胡越矣則新書之文滅胡越而
崇中夏也是以其心切其憤深其詞隱而麗其藻傷而
雅余悲生哀平之見棄又生不能自明其道嗚呼聖賢

之文與道也求知與用苟不在於一時而在於百世之
後者乎其生之哀平歟余之悲生歟吾之道也廢與用
幸未可知但不知百世之後得其文而存之者復何人
也咸通癸未中南浮至沅湘復沈文以悼之其辭曰

粵炎緒之媽繇兮其國度之未彰天錫生以命理兮異
其道之益光偉吳公之知賢兮道其名於文皇既軫

軫軫以召之兮遂位之於上庠愍耄儒之蠢愚兮對天

問之不減既羣儒之讓俊兮馳其譽之煌煌嗟大漢之

丕緒兮蚪其賢於汙潢上下溷而不分兮議制削於驕
王殺僂僂而不制兮斷梓胡與寇攘羌虜全以侵華兮
曾不能以抑強餌其嗜之延延兮實三代之計良念五
德之更承兮論醜結而不綱乃秉臆以興說兮數用五而
色尚黃又諸侯以開國兮輸其租於咸陽曾不得以撫
民兮俾其君兮何忘請紆縲以乘印兮各馳化於所疆
上既悅而欲大用兮遭絳灌與東陽道既擯兮何明乃
出傳於沅湘停沅波之涵洳兮或漾棹以夷猶望靈均

之沒所兮顛

顛

其心之怡怡

尺

遙臨汨羅之浩漾兮想懷

沙之幽憂森樛蘿以蒼鬱兮時迸狄以相號霧雨暗乎
北渚蝸蠃毒乎芳洲景黯沮以不明兮若天悼乎離騷
香依依兮杜若韻淒淒兮篋篋山隱隱以掃空兮煙微
微而淡秋羌吾不知所感兮淚曠恨以橫流當抱蠹於
渺藩兮曾無足以少休既茨藂以傷思兮又鴝鷖以動
愁嗚呼哀哉世既不平領吾道以為非兮吾復何依蘋
蘭憔悴兮稂莠繁滋麟鳳匿迹兮梟獍騰威憤匠罷斧

兮拙者構之離婁閉目兮瞽者揚眉子都蒙袂兮敦洽
騁姿嗚呼哀哉亦先生之尤也胎丑其世之不可兮何
不解而去位又垂萬世之名取捨在此奚自謗於童殺
兮乃憫然而為累蓋伊尹三就五就之心兮異其民之
可治奈惛惛以不悟兮又被之以非議幸一人之再覺
兮荅受釐之奧義既辱王以墮駕兮乃寃慟而已矣訊
曰君不明兮莫我知幽都寂兮和涕歸文懸日月兮俟
後聖用之大故忽兮其何足悲

江有楓一篇十章并序

蕭頴士

江有楓思陸鄭二友吳會舊遊且疾讒也君宦于尹府以直方不偶見偏讒佞惟古之賢者有避色避言之義矯然去之二室之間有槭樹焉與江南楓形胥類憩於其下而作是詩以貽夫二三子焉

江有楓其葉蒙蒙我友自東于以遊從山有槭其葉漠漠我友徂北于以休息想彼槭矣亦類其楓矧伊懷人而忘于東東可遊矣會之丘矣于山于水于廟于寺于

亭于里君子遊焉于以宴喜其樂疊疊粵東可居彼吳

之墟有田有庭有朋有書有尊有魚君子居焉惟以宴

醕其樂徐徐我朋在矣彼陸之子

彼陸之子淹也

如松如杞如

問不已我友于征彼鄭之子

彼鄭之子愕也

如琇如英德音孔

明我思震澤菱芡幕幕寤寐如覲我思剡谿杉篠萋萋

寤寐無迷有鳥有鳥粵鷗與鷺浮湍戲渚皓然絜素忘

其猜妬彼何人斯曾足傷懼此懼維何懼寘于羅彼驕

者子讒言孔多我聞先師體命委和公伯之愬則如予

何悵然山河惟以嘯歌其憂也哉

菊榮五章

并序

菊榮酬贈離且申志也久寓大邑賢宰宋侯惠而好予
賦鳴蟬以賦別有懷相規備厥卒章予以報焉

采采者菊芬其榮斯紫英黃萼照灼丹墀愷悌君子佩
服攸宜王國是維大君是毗

宋即太尉文
貞公之子也

貽爾子孫百

祿萃之

采采者菊于邑之城舊根新莖布葉垂英彼美淑人應

家之禎有弦既鳴我政則平宜爾棟崇必復其慶

采采者菊于邦之府陰槐翳柳邇楹近宇彼勞者子喧
卑是處慨其莫知蘊結誰語企彼高人色斯遐舉

采采者菊于賓之館既低其枝又弱其榦有匪君子是
焉披翫良辰旨酒宴飲無算愴其化別終然永嘆

歲方宴矣霜露殘促誰其榮斯有英者菊豈微春華懿
此貞色人之侮我混于薪棘詩人有言好是正直

有竹一篇七章

并序

有竹懿李新後閤而讌親友也

有竹斯竿于閤之前君子秉心惟其貞堅兮有竿斯竹
于閤之側君子秉操惟其正直兮彼蔚者竹蕭其森矣
有開者閤宛其深矣迴簷幽砌如翼如齒冬之宵霰雪
斯灑我有金鑪煔其以歇夏之日炎景斯鬱我有珍簟
淒其以粟彼紛者務休其豫矣有旨者酒歡其且矣友
僚萃止跗萼載韡彼美公之姓兮那歟應積慶兮期子
惟去之柄兮

蟬鳴五章 并序

宋華

蟬鳴感秋興送將歸也僻守外邑而蘭陵子相過詰朝
言歸賦詩見志以申贈焉

蟬其鳴矣于彼疎桐庇影容跡何往不容嘒嘒其長永
託于風未見君子我心忡忡既見君子樂且有融

彼蟬鳴兮于林之表含風飲露以樂吾道有懷載遷伊
誰云保未見君子我心悄悄既見君子披豁予抱

蟬鳴蟬鳴幽暢乎而肅肅爾庭遠近涼颺言赴高柳叢

篁間之思而不見如渴如饑亦既覲止我心則夷
蟬鳴伊何時運未與匪歎秋徂怨斯路阻願言莫從鬱
悒誰語君子至止慰我延佇何斯違斯倏邇遐舉
歲之秋深蟬其夕吟披衣軒除蕭蕭風林我友來斯言
告離衿何以叙懷臨水鳴琴何以贈言委順浮沉

涼雨一章 并序

蕭穎士

涼雨志楊侯樂賓僚也

習習涼雨泠泠浮颺君子樂胥于其賓僚有女斯夭式

歌且謠歡言終宵惟以招邀于胥樂兮

虞獲子鹿一篇

并序

韋應物

虞獲子鹿憫園鹿也遭虞之機張見畜於人不得遂其天性焉

虞獲子鹿畜之城陬園有美草池有清流但見蹙蹙亦聞啾啾誰知其思巖谷之游

上古之什補亡訓傳十三章

顧況

上古慙農也

遐哉上古生棄與柱勾龍氏主乃有甫田惟彼甫田有
萬斯年開利之源無乃塞源一廛亦官百廛亦官嗇夫
孔艱浸兮嘆兮申有螽兮惟馨祀是患豈止餒與寒嗇
夫咨咨秀盛苗哀耕之耰之襍襍鋤犁手胼足胝水之
蛭螾吮喋我肌我姑自思胡不奮飛東人利百西人利
百有匪我心胡為不易河水活活萬人逐末俾爾之愉
悅兮

上古一章

左車憑險也

震為雷兄長之左東方之師也憑險不已君子憂心而作是詩

左車有慶萬人猶病曷可去之于黨孔盛敏爾之生胡為波迸

左車有赫萬人毒螫曷可去之于黨孔碩敏爾之生胡為草戚

左車二章

築城刺臨戎也寺人臨戎以墓塼為城壁

築城登登于以作固咨爾寺兮發郊外冢墓死而無知

猶或不可若其有知惟上帝是愬

築城奕奕于以固敵咨爾寺兮發郊外冢甃死而無知
猶或不可若其有知惟上帝是謫

築城二章

持斧啟戎士也戎士伐松柏為蒸薪孝子徘徊而作是
詩

持斧持斧無翦我松柏兮

持斧一章

十月之郊造公室也君子居公室當思布德行化焉

十月之郊羣木肇生陽潛地中舒達勾萌曠其蔚兮不
可以遊息乃爍蒺藜乃夷荆棘乃繇彼曲直匠氏度思
登斧以時澤梁蓐蓐無或夭枝有巨根蒂生混茫際呼
吸羣籟萬人揮斤坎坎有厲陸遷水濟百力殫弊審方
面勢姑博其製作為公室公室既成禦燥濕風日棟之
斯厚椽之斯密如翼于飛如鱗櫛比繚以周墉城以崇
階俯而望之直矗與雲齊礪砢砢藻井旋題丹素之煥

兮椒桂之馥兮高閣高閣珠綴結絡金鋪爛若不集于
鳥雀繪事告畢賓筵秩秩乃命旨酒琴瑟琴瑟在堂莫
不靜謐周環掩闕仰不漏日冬日嚴凝言納其陽和風
載昇夏日鬱蒸言用于陰涼風颯興有匪君子自賢不
已乃夢乘舟乃夢乘車夢人占之更爽其居炎炎則移
皎皎則虧木實之繁兮明年息枝爰處若思胡寧不爾
思

十月之郊一章

燕于巢審日辰也

燕不以甲乙銜泥

燕燕于巢綴葺維戊甲兮乙兮不宜有謬飛龍在天雲
掩于斗曷日于雨乃曰庚午彼日之差亦孔斯醜昔在
義和酒淫不修我筮我龜莫我告繇肩迺征之彛倫九
疇君子授律是禡是禴三五不備罔克攸遂惠此蒸人
毋廢爾事爾莫我從維來者是異

燕于巢一章

蘇方諷商胡舶舟運蘇方歲發扶南林邑至齊國立盡

蘇方之赤在胡之舶其利乃博我土曠兮我居闕兮我
衣不白兮朱紫爛兮傳瑞曄兮相唐虞之維百兮

蘇方一章

陵霜之華傷不實也

陵霜之華我心憂嗟陰之勝矣而陽不加塊軋陶鈞乃
帝乃神乃舒乃屯烈烈嚴秋熙熙陽春職生有倫今華
發非其辰辰屬東方之仁遐想三五黃帝登雲堯年百
餘二儀分位六氣不渝二景如璧五星如珠陵霜之華

兮何不妄敷

陵霜之華一章

囷哀閩也

囷音蹇閩俗呼子為囷父為郎罷

囷生閩方閩吏得之乃絕其陽為減為獲致金滿屋為
髡為鉗如視草木天道無知我懼其毒神道無知彼受
其福郎罷別囷吾悔生汝及汝既生人勸不舉不從人
言果獲是苦囷別郎罷心摧血下隔地絕天及至黃泉
不得在郎罷前

困一章

我行自東不遑居也

我行自東山海其空旅棘有叢我行自西壘與雲齊雨
雪淒淒我行自南烈火滿林日中無禽霧雨淫淫我行
自北燭龍寡色何枉不直我憂京京何道不行兮

我行自東一章

採蠟怨奢也荒巖之間有以纒蒙其身腰藤造險及有
羣蜂肆毒哀呼不應則上捨藤而下沉壑

採採者蠟于泉谷兮煌煌中堂烈華燭兮新歌善舞弦
柱促兮荒巖之人自取其毒兮

採蠟一章

倬彼我系一篇九首

王勃

倬彼我系舍弟虢州叅軍勃所作也傷迫乎家貧道未
成而受祿不得如古之君子四十強而仕也故本其情
性源其事業因陳先人之迹以議出處致天爵之艱難
也

倬彼我系出自有周分疆錫社派別枝流居衛仕宋匡
嬴相劉迺武迺文或公或侯

晉歷崩圻衣冠擾弊粵自太原播徂江滙禮喪賢隱時
屯道閉王室如燬生人多殪

伊我有器思逢其主自東旋西擇木開宇田彼河曲家
乎汾浦天未厭亂吾將誰輔

伊我祖德思濟九埏不常厥所于茲五遷欲及時也夫
豈願焉其位雖屈其言則傳

爰述帝制大蒐王道曰天曰人是祖是考禮樂咸若詩
書具草貽厥孫謀永為家寶

伊余小子信慙明哲彼網有條彼車有轍思屏人事克
終前烈于嗟代網卒余來綫

來綫伊何謂余曰仕我瞻先達三十方起夫豈不懷高
山仰止願言毓德啜菽飲水

有鳥反哺其聲嗷嗷言念舊德憂心忉忉今我不養歲
月其滔僂俛從役豈敢告勞

從役伊何薄求卑位告勞伊何來叅卿事名存實盡負
信愆義靜言遐思中心是愧

元和聖德詩一首

并序

韓愈

臣愈頓首再拜言曰臣伏見皇帝陛下即位以來誅流
姦臣朝廷清明無有欺蔽外斬楊惠琳劉闢以收夏蜀
東定青徐積年之叛海內怖駭不敢違越郊天告廟神
靈歡喜風雨明晦無不從順太平之期適當今日臣蒙
被恩澤日與羣臣序立紫宸殿下親望穆穆之光而其

職業又在以經籍教導國子誠宜率先作歌詩以稱道
盛德不可以詞語淺薄不足以自效為解輒依古作四
言元和聖德詩一篇凡千有二十四字指事實錄具載
明天子文武神聖以驚動百姓耳目傳示無極其詩曰
皇帝即祚物無違拒曰暘而暘曰雨而雨維是元年有
盜在夏欲覆其州以踵近武皇帝曰嘻豈不在我負鄙
為艱縱則不可出師征之其衆十旅軍其城下告以福
禍腹敗枝披不敢保聚擲首俾外降幡夜豎疆外之險

莫過蜀土韋臯去鎮劉闢守後血人于牙不肯吐口開
庫啗士曰隨所取汝張汝弓汝伐汝鼓汝為表書求我
帥汝事始上聞在列咸怒皇帝曰然嗟遠士女苟附而
安則且付與讀命于庭出節少府朝發京師夕至其部
闢喜謂黨汝振而伍蜀可全有此不當受萬牛鬻肉萬
甕行酒以錦纏股以紅帔首有恇其兇有餌其誘其出
穰穰隊以萬數遂劫東川遂據城阻皇帝曰嗟其又可
許爰命崇文分卒禁禦有安其驅無暴我野日行三十

徐壁其右闢黨聚謀鹿頭是守崇文奉詔進退規矩戰
不貪殺擒不濫數四方節度整兵頓馬上章乞討俟命
起坐皇帝曰嘻無汝煩苦荆并洎梁在國門戶出師三
千各選爾醜四軍齊作殷其如阜或披其角或脫其距
長驅洋洋無有齟齬八月壬午闢棄城走載妻與妾包
裹稚乳是日崇文入處其宇分散逐捕搜原剔藪闢窮
見窘無地自處俯視大江不見洲渚遂自顛倒若杵投
白取之江中枷脰械手婦女累累啼哭拜叩來獻闕下

以告廟社周示城市咸使觀覩解脫攀索夾以砧斧婉
婉弱子赤立偃僂牽頭曳足先斷腰脅次及其徒體骸
撐拄末乃取闕駭汗如寫揮刀紛紜爭刳膾脯優賞將
吏扶珪綴組帛堆其家粟塞其庾哀憐陣歿廩給孤寡
贈官封墓周帀宏溥經戰伐地寬免租簿施令酬功急
疾如火天地中間莫不順序幽恒青魏東盡海浦南至
徐蔡區外雜虜怛威赧德踧蹈舞掉棄兵革私習簋
盥來請來覲十百其耦皇帝曰吁伯父叔舅各安爾位

訓厥眊晦正月元日初見宗祖躬執百禮登降拜俯薦
于新宮視瞻梁杞戚見容色淚落入俎侍祠之臣助我
惻楚乃以上辛於郊用牡除于國南鱗荀毛簋廬幕周
施開揭磊砢獸盾騰挈圓壇帖妥天兵四羅旂常婀娜
駕龍十二魚魚雅雅霄昇于丘奠璧獻罍衆樂驚作轟
虺融冶紫焰嘘呵高靈下墮羣星從坐錯落侈哆日君
月妃煥赫嫗婉瀆鬼濛鴻嶽祗業莪飶沃羶薌產祥降
嘏鳳皇應奏舒翼自拊赤鱗黃龍透蛇結糾卿士庶人

黃童白叟踊躍歡呀失喜噎歐乾清坤夷境落褰舉帝
車迴來日正當午幸丹鳳門大赦天下滌濯剗磔磨滅
瑕垢續功臣嗣拔賢任考孩養無告仁滂施厚皇帝神
聖通達今古聽聰視明一似堯禹生知法式動得理所
天錫皇帝為天下主并包畜養無異細鉅億載萬年敢
有違者皇帝勤儉盥濯陶瓦斤遣浮華好此緜紵勅戒
四方侈則有咎天錫皇帝多麥與黍無召水旱耗于雀
鼠億載萬年有富無窶皇帝正直別白善否擅命而狂

既翦既去盡逐羣姦靡有遺侶天錫皇帝厯臣碩輔博
問遐觀以置左右億載萬年無敢侮皇帝大孝慈祥
悌友怡怡愉愉奉太皇后浹于族親濡及九有天錫皇
帝與天齊壽登茲太平無怠永久億載萬年為父為母
博士臣愈職是訓詁作為歌詩以配吉甫

鄆州谿堂詩一章

并序

憲宗之十四年始定東平三分其地以華州刺史禮部
尚書兼御史大夫扶風馬公為鄆曹濮節度觀察等使

鎮其地既一年襲其軍號曰天平軍上即位之二年召
公入且將用之以彼之人安於公也復歸之鎮上之三
年公為政於鄆曹濮也適四年矣治成制定衆志大固
惡絕於心仁形於色竭心力以供國家之職于時沂密
始分而殘其帥其後幽鎮魏不悅于政相扇繼變復歸
於舊徐亦乘勢逐帥自署同於三方惟鄆也截然中居
四鄰望之若防之制水恃以無恐然而皆曰鄆為虜巢
且六十年將強卒武曹濮於鄆州大而近軍所根柢皆

驕以易怨而公承死亡之後掇拾之餘剥膚椎髓公私
埽地赤立新舊不相保持萬目睽睽公於此時能安以
治之其功為大若幽鎮魏徐之亂不扇而變此功反小
何也公之始至衆未熟化以武則忿而憾以恩則橫而
肆一以為赤子一以為龍蛇憊心罷精磨以歲月然後
致之難也及教之行衆皆戴公為親父母夫叛父母從
仇讐非人之情故曰易於是天子以為尚書右僕射扶
風郡開國伯以褒嘉之公亦樂衆之和知人之悅而侈

上之賜也於是為堂於其居之西北隅號曰谿堂以饗士大夫通上下之志既饗其從事陳魯謂其衆言公之畜此邦其勤不亦至乎此邦之人纍公之化惟所令之不亦順乎上勤下順遂濟登茲不亦休乎昔者人謂斯何今者人謂斯何雖然斯堂之作意其有謂而喑無詩歌是不考引公德而接邦人於道也乃使來請其詩曰帝奠九壘有葉有年有荒有條河岱之間及我憲考一牧正之視邦選侯以公來尸公來尸之人始未信公不

飲食以訓以徇孰飢無食孰呻孰歎孰寃不問不得分
願孰為邦蝨節根之螟羊很狼貪以口覆城吹之煦之
摩手拊之箴之石之膊而磔之凡公四封既富以強謂
公吾父孰違公令可以師征不寧守邦公作谿堂播播
流水淺有蒲蓮深有蒹葦公以賓燕其鼓駭駭公燕谿
堂賓校醉飽流有跳魚岸有集鳥既歌以舞其鼓考考
公在谿堂公御琴瑟公暨賓贊稽經諏律施用不差人
用不屈谿有蒼芡有龜有魚公在中流右詩左書無我

數遺此邦是庶

漢隄詩一首

并序

盧肇

上元年秋漢水大溢齧襄隄以入既沈漢郛遂滅岷趾
棟椽且流壓溺無算襄之城僅以門免三日水去陷為
大塗餘民棲于楚山號不敢下餒躓相挽其能全者什
六七上大憂曰襄惟東南實脰荆海若氣不息吾躬曷
瘳今天下降下災于有漢庭垣盡渚齒骼在淖有嬰墜
井母實號之今襄臣盡墜吾號尚及哉咨乃卿士疇能

振之以易吾亂咸以地官范陽公舊理南粵島夷率化
甘于民心俾踐于襄必克底又上俞以往公既至省漢
之溺由舊防之不固幾五十載又詢之漢水之不犯襄
鄆惟是甚災既魚士庶災或能嗣孰以遏之募民新漢
之隄食敵其功資三其食因故隄之址廣倍之高再倍
之距襄之郊繚半百里明年春隄成公具以疏上大歡
復襄之疲民一祀賑穀十萬斛民既保寧謳歌怡愉既
而舒蘇不知曩之災也昔狄敗衛侯于熒澤齊桓公帥

諸侯城緣陵以居之而衛國忘亡君子是以稱桓公之德今公之為是隄也襄有衛人之思焉而況宣天子之慈以生厥民曷齊桓之尚哉噫五材之生沴也必極于物物之既極天必資明哲以蘇之理之常也古之人有力保一邑勇禦一寇謂之有功尚以金石載之况捍大災救大患其美若是豈得無稱焉是宜以聲詩播之登于樂府惟漢亦有瓠子之歌是可類之謹按正考甫作商詩公子奚斯命太史克請于周作魯詩皆其國之公

族也肇於公為族孫幸力於文所不宜默惟峴之碑曰
羊公惟隄之詩曰盧公是古今之相光昭也其誰曰不
然詩曰

陰沴奸陽來暴于襄洎入大鄆波端若銛觸厚摧高不
知其防駭潰顛委萬室皆毀竈登蛟鼉堂集鱸鮪惟思
若讐母不能子洪潰既涸閉閔其虛以隳我堵以剝我
廬酸傷顧望若踐丘墟帝曰念嗟朕日南顧流災降慝
天曷台怒滔滔襄郊梓我嬰孺於惟餘毗飢傷喘呼

故火

斯為淫瘼孰往膏傅惟汝元寮僉舉明哲我公用諧苴

茅杖節來視襄人燠

許六切

焦

許又切

提挈不日不月咄乎

抃悅乃泳故隄陷于沙泥缺落坳圯由東訖西公曰嗚

呼漢之有隄實命

性命之命

襄人不力乃力則及乃身具錘

與畚漢隄其新帝廩有粟帝府有緡爾成爾隄必錫爾

勤襄人怡怡聽命襄許背囊肩杵奔走蹈舞分之卒伍

令以麾鼓尋尺既度日月可數登登業業周旋上下披

峴斲楚

楚峴二山在襄南

飛石輓土舉築殷雷駭汗霏雨疲瘡

鰥獨奮有筋脊呀呀來助提筐負筥不勞其勞雜沓笑
語咸曰盧公來賜我生斯隄既成蜿蜿而平確爾山固
屹如雲橫漢流雖狂堅不可蝕代千年億與天無極惟
公之隄昔在人心既築既成橫之于南萌渚不峻此門
不深今復在茲于漢之陰斯隄已崇茲民獲祐覲童相
慶室以完富貽于襄人願保厥壽繫公之功赫焉如晝
捍此巨災崒若京阜天子錫之百姓載之族孫作詩昭
示厥後

有所恨二章

并序

歐陽詹

有所恨由故人馬紳死而興也予待試京師六年與馬
生相知者四秋性與情相合也衣與食相同也予及第
歸覲故園自別來無憶不至於襟懷無想不至於姿容
願一促膝怒如也昨既至止馬生且疾巫者忌以見人
曰不見即愈見即害遂忍即見庶以求見忍者五日馬
生云亡噫故人也昔越萬里猶求見焉惑乎一言蔽乎
一垣而死生以之死生之道千秋之離也五日之面半

旬之歡也尚可半旬之歡不就而卒甘千秋之離一恨也又與生別搯執都門生脫紫羅半臂曰即日相去秦吳聊以為憶予貧也素乏衣服不暇藏篋笥聯緜在身二年間同弊帛以棄所以新而輕著故而不留者予實未哀馬其方少爾斯日日相與也所留何止在茲乎今人既往所贈又造次而亡之二恨也申二恨為有所恨二章云

我思君子吁嗟萬里亦既至止曷不覲止本不信巫而

巫言是履在門五日如待之死有所恨兮
我思遺衣為憶以貽亦既受止曷不保持本不欺友而
友情是違隔生之贈造次亡之有所恨兮

河之水二章寄姪老成

韓愈

河之水去悠悠我不如水東流我有孤姪在海陬三年
不見兮使我生憂日復日夜復夜三年不見汝使我鬢
髮未老而先化

河之水悠悠去我不如水東注我有孤姪在海浦三年

不見兮使我心苦采蕨于山緡魚于泉我徂京師不其
還

唐文粹卷十一